

6. november 2017

UKA2017/31

**Apequteqaat aallaavigalugu Inatsisartut oqallinnissaannik siunnersuut, una pillugu:
Nunatta napparsimaviini katsorsaasoqarnikkut maannakkut siunissamilu amerlassutsitigut
ikinnerpaaffiliisimanerput qanoq iliorluta naammassineqarnissaa qulakkeersimassavarput.**
(Inatsisartunut ilaasortaq Jens-Erik Kirkegaard, Siumut)

Inatsisartuni Ilaasortap Jens-Erik Kirkegaard-ip Siumup oqallisissiaa qujarullugu tikilluaqqarput. Oqallisissiami saqqummiunneqartut isumaqatiginarluinnartut tamaasa immikkut oqaaseqarfiginagit ataatsimoorussinerusumik imaattumik oqaaseqassaagut.

Nunatta napparsimaviini nakorsassaaleqisarneq peqqissaasussaaleqisarneq ukiorpassuanngortuni ajornartorsiutaajuarpoq, aammalu nalunngilarput nunatsinni inuttoorsuunngikkaluarluta nunattali isorartunera pissutigalugu peqqinnissaqarnikkut akisuumik ingerlatsisariaqarluta. Aap peqqinnissaqarfitsinnut ukiumut 1,4 mia. kr. sinningaatsiallarlugit aningaasartuutigisarpavut, taakkunangalu naammassiatigut angusaaasartut pitsaassuserlu nunanut allanut naleqqiullugu nalilersoruminaas-sinnaasarpoq, nuani allani peqqissutsikkut pissutsit pillugit ilisimasavut killeqarmata. Kisianni nalunngilarput peqqinnissaqarnikkut ingerlatsinerput tamarmi Danmarkimi sullissinermut attuumassuteqarluinnartumik ingerlallutigu, tamanna tupinnanngilaq ukiorpassuarni naalagaaffeqatigiinnermi pissutsit aallaavigilluinnarlugit ingerlatsigatta, aamma sorpassuartigut iluaqutaasumik.

Siumumiit pingaartipparput peqqinnissaqarfitta pitsaasumik toqqissisimanartumillu innuttaasunut sullissiviunissaa, aammalu soorunami sulissarpassuarnut malinnaalluni naleqqussaaquarlunilu ingerlatsinissaa. Taamaammat peqqinnissaqarfiup sulisoqarnikkut naleqqussartuarnissaa aamma pisariaqarpoq, soorlu Siumumiit pingaartilluinnarparput Kalaallit nunatsinneersut nakorsatut ilinniakkaminnik naammassinnittartut piumagunik nunatsinni sulisorineqartarnissaat aammalu pingaartipparput nunatsinni nammineeirluta uagut peqqinnissaqarfitsinni sulisussanik ilinniarsimasunik amigaateqarallartilluta nunarsuarmioqataasutut inerikkiartoratta aamma nunat allamiunik nakorsanik peqqissaasunillu sulisoqartarsinnaanerup ammaffiginerulernissaa, aqqutissiuunnerunis-saalu. Nalunngilarput Danmarkimi peqqinnissakkut sulisut ilinniarsimasut aamma amigaatigineqartarmata, taamaattumik nunanit allaniit aqulluakkamik suliaartortitsisalersinaaneq periarfissatsialaavoq aamma nunatsinnit angusarineqartartutigit ajunngitsumik pissarsissutaasinnaasoq.

Oqallisissiorloq isumaqatigaarput nunatta nunanut allanut ammanerusumik ingerlatsilernissaanut inatsisitigut aporfiusinnaasut tamaasa qulaajarneqartariaqarput, taamaaliornikkut naleqqussaanssat pisariaqartut pisinnaaqqullugit.

Maluginiarparput Naalakkersuisut akissumminni oqallisissiamik siunnersuuteqartoq

isumaqatigigaat nutaanik aaqqissuussinissaq nutaanillu aaqqiissuteqarnissaq pisariaqartinneqartut pillugit. Siumumiit Naalakkersuisunut kaammattuutigissuarput, siunnersuummi isummersuutit atorluarlugit siunissami qaninnerusumi timitalersuinissaq anguniaqqullugu.

Taamannak oqaaseqarluta oqallinnissamik siunnersuuteqartoq qutsavigaarput. Naalakkersuisullu akissuteqaataanni taakkartorneqartut isumalluarfigalugit.

Jess Svane, Siumut